



TIMÓR LÉSTE

REPÚBLIKA DEMOKRÁTIKU TIMÓR LÉSTE

Xefe Estadu: Taur Matan Ruak

Xefe Governu: Rui Maria de Araújo (troka Kay Rala Xanana Gusmão iha Fevereiru)

Impunidade kontinua ba violasaun grave hasoru direitus umanus ne'ebé komete durante okupasaun Indonézia (1975-1999). Forsa seguransa sira hetan akuzasaun katak sira halo kapturasaun arbitrária no uza forsa ne'ebé la nesesáriu ka exesivu durante hala'o operasaun seguransa iha Distritu Baukau. Nivel violénsia doméstika sei kontinua aas.

Antesedénsia

Iha Fevereiru, Rui Maria de Araújo, lider husi *Frente Revolucionária de Timor-Leste Independente* (FRETILIN) simu pose nu'udar Primeiru Ministru. Governu foun inklui koligasaun husi maioria partidu polítiku, inklui Xanana Gusmão nia Kongresu Nasionál Rekonstrusaun Timor-Leste. Iha Setembru, ONU nia Komisaun kona-ba Direitu Labarik nian reeve Timor-Leste.

Impunidade

Iha progresu uitoan de'it hodi tau matan ba krime kontra umanidade no violasaun sira seluk kontra direitus umanus ne'ebé komete husi Indonézia nia forsa seguransa sira no sira-nia milísia entre 1975 - 1999. Ema barak ne'ebé deskonfia halo krime sei livre iha Indonézia.

Autoridade sira la relata progresu ruma kona-ba implementasaun ba rekomendasaun sira hodi tau matan ba impunidade ne'ebé fó-sai husi Komisaun Simu-Malu, Lia-loos no Rekonsiliaun (CAVR) no komisaun bilaterál entre Indonézia-Timor-Leste kona-ba Lia-loos no Amizade (CTF). Iha Setembru, relatóriu segimentu ida husi ONU nia Grupu Serbisu kona-ba Desaparesimentu Forsadu ka La Voluntáriu lamenta katak Timor-Leste seidak halo debate kona-ba ezbosu lei hodi estabelese Institutu ba Memória Pública, ho intensaun atu implementa CAVR no CTF nia rekomendasaun sira.

Sistema Justisa

Sei iha informasaun katak forsa seguransa sira halo tortura no tratamentu aat sira seluk ka uza forsa ne'ebé la nesesáriu ka exesivu. Mekanizmu responsabilizasaun sei fraku.

Ema lubuk ida hetan kaptura arbitrária no tortura ka hetan tratamentu-aat seluk ruma husi forsa seguransa sira nu'udar parte husi operasaun seguransa konjunta iha Distritu Baukau entre Marsu no Agostu. Operasaun hirak-ne'e lansa ona hodi responde ba atake sira ne'ebé tuir alegasaun halo husi Mauk Moruk (Paulino Gama) no nia Konsellu Revolusaun Maubere (KRM), nu'udar organizasaun ne'ebé bandu tiha ona, hasoru polísia iha Laga no sub-distritu Baguia. Organizasaun lokál sira ne'ebé tau matan ba direitus umanus dokumenta kazu lubuk ida ne'ebé ofisiál seguransa baku ema no mós harahun propriedade ba ema ne'ebé sira deskonfia sai membru KRM.¹ Iha Agostu Mauk Moruk hetan tiru no mate. Konkluzaun sira husi investigasaun Provedór nian (Provedór ba Direitus Umanus no Justisa) fó-sai iha Novembru.

Sistema justisa sei enfrenta obstákulu tanba falta asesu ba tribunál sira no prosesu ne'ebé loloos. Ofisiál judisiál internasionál hotu-hotu ne'ebé serbisu nu'udar juis, prokurador no investigadór sira hetan espulsaun iha Outubru 2014 ne'ebé kontinua kria problema ba julgamentu sira ne'ebé sei pendente hela, inklui julgamentu sira ne'ebé tau matan ba krime kontra umanidade.

Feto sira-nia direitu

Lei 2010 ne'ebé hatuur katak iha obrigasaun atu prosesa kazu violénsia doméstika kontinua aplika iha prátika maibé sei iha dezafiu. ONG sira hato'o preokupasaun kona-ba asesu ba justisa, protesau limitada ba sasin-na'in no vítima sira, no kazu sira ne'ebé hada hela, no tanba ne'e feto uitoan de'it ho ativu hato'o keixa.

Iha Novembru, Komisaun CEDAW rekomena katak Timor-Leste tenke adota lei sira hodi garante reparasaun abranjen ba vítima sira ne'ebé sofre violasaun seksuál no violénsia seksuál seluk ne'ebé akontese durante okupasaun Indonézia no referendu iha 1999, no sei laiha impunidade ba violénsia seksuál ne'ebé komete durante okupasaun.

ⁱ Ema lubuk ida hetan kaptura no tortura iha Timor-Leste ([ASA 57/1639/2015](#))